



Eleisaun Prezidensiál 2022

Manuál ba Prezidente Sentru Votasaun



Emite husi Sekretariadu Tékniku
ba Administrasaun Eleitorál (STAE)

Fevereiru 2022

Implementadu husi:



Finansiadu husi:



From
the People of Japan

BENVINDU

Benvindu ba Eleisaun 2022 ba Prezidente Repúblika Demokrátika Timor-Leste.

Bainhira ita serbisu nu'udar Sekretáriu Estasaun Votasaun, ita sei tulun ita-nia maluk Timoroan sira atu ezerse direitu báziku no importante ida husi sira-nia direitus umanus: liberdade hodi hili sé maka sei sai sira-nia lider no reprezentante. Timoroan sira servisu maka'as durante tinan barak hodi hetan direitu ne'e, nune'e duni ita tenke senti orgullu boot tanba komunidade fó fiar ba ita atu garante katak sira kontinua iha direitu ne'e.

Administrasaun eleitorál iha prinsípiu importante neen ne'ebé ita tenke uza nu'udar matadalan.

- **Respeitu ba lei** - Lei eleitorál hanesan “regras jogu nian” ne'ebé komunidade simu. Ofisiál eleitorál sira hanesan árbitru iha jogu futeból, sira-nia knaar maka atu garante katak hotu-hotu komprende no tuir regra ne'ebé iha.
- **La-partidáriu no neutru** - Administrasaun eleitorál ne'ebé neutru maka importante liu. Timoroan sira espera katak ofisiál eleitorál sira hala'o serbisu ne'ebé justu no la ho ta'uk, ka la fó benefísiu ba ema ida. Iha loron eleisaun nian maske ita iha ita-nia opiniaun rasik, ita **sei labele** favorese ka fó benefísiu ba kandidatu ruma, maske ita iha ita-nia sentimentu rasik. Votante hotu-hotu tenke simu tratamento ne'ebé hanesan, no desizaun hotu-hotu ne'ebé ita foti tenke iha konsisténsia no tuir lei.
- **Transparénsia** - Eleisaun ne'ebé iha susesu, mak ida ne'ebé kandidatu no votante sira hotu-hotu simu ho laran metin katak rezultadu mosu liu husi prosesu ne'ebé justu. Hodi sira bele laran metin, aspetu hotu-hotu votasaun no kontajen votus nian tenke nakloke ba observasaun.
- **Loloos** - Dala ruma eleisaun bele lakon ka manán ho diferença ki'ik votus nian, nune'e duni importante katak aspetu hotu-hotu serbisu nian tenke hala'o loloos no ho atensaun ba detalles sira.
- **Inklusaun** - Karakterística fundamental iha eleisaun demokrátiku mak votante hotu-hotu iha direitu hanesan atu partisipa. Maibé tuir realidade, hodi bele realiza, importante katak fó asesu kompletu ba votante hirak ne'ebé bele hasoru obstáculo kona-ba sira-nia partisipasaun, hanesan feto sira, ema ho defisiénsia no ferik no katuas sira”
- **Serbí votante sira** - Bainhira ita haree sira, votante sira halo ona esforsu hodi la'o to'o Sentru Votasaun, no ba balun - hanesan hirak ne'ebé ho defisiénsia, hirak ne'ebé la'o husi dook - sei enfrenta dezafiu boot. Nune'e duni importante katak ita halo sira-nia esperiénsia eleisaun nian seguru no konveniente tebes.

Desde eleisaun uluk nian iha 2018, iha mudansa signifikante balun ba prosesu eleitorál, nune'e duni halo favór lee Manuál ne'e didi'ak hodi nune'e ita bele komprende hotu saida mak ita tenke halo iha ita-nian Sentru Votasaun.

Acilino Manuel Branco
Director-Geral do STAE

Konteúdu

Parte 1 - Introdusaun - propózitu no estrutura Manuál ne'e nian	1
Parte 2 - Sentru Votasaun no Estasaun Votasaun sira	1
Parte 3 - Mudansa ne'ebé halo ba prosedimentu eleitorál tanba Covid-19	3
Parte 4 - Ita-nia knaar	4
Parte 5 - Mantein ambiente ne'ebé iha ordén no neutru kona-ba politika	5
Parte 6 - Preparasaun molok loron eleisaun.....	7
Dezeñu Sentru Votasaun	7
Pesoál	9
Treinu	9
Simu ekipamentu no materiál sira	9
Loron ida molok eleisaun	10
Parte 7 - Fiskais, observadór, monitorizador, no profisionál mídia sira.....	10
Fiskais	11
Observadór no monitorizador sira	12
Profisionál Mídia sira nian	14
Kestionar, reklamasaun no protestu	15
Parte 8 - Votasaun iha loron eleisaun	16
Preparasaun molok atu loke votasaun (06:00 to 07:00).....	17
Parte 9 - Kontajen iha loron eleisaun	19
Planu molok hala'o kontanjen	19
Eskema jerál kontajen nian	20
Kontajen Votu individuál - Sura Votu ida-idak.....	21
Konkluaun prosesu kontajen	24
Parte 10 - Rezolve problema no emerjénsia sira	25
Materiál importante la suficiente	26
Asidente ka moras	26
Kazu iha ne'ebé imposivel atu hala'o votasaun ka tenke Suspende votasaun	26
Aneksu 1 - Ezemplu Akta Sentru Votasaun.....	28
Aneksu 2 - Materiál ne'ebé atu fornese ba Sentru no Estasaun Votasaun ida-idak	34

Parte 1 - Introdusaun - propózitu no estrutura Manuál ne'e nian

1.1 Propózitu Manuál ida ne'e nian mak atu fó instrusaun detalladu kona-ba oinsá atu monta no dirije ita-nia Sentru Votasaun. Manuál ne'e ho tan dokumentus hirak tuir mai, inklui iha pakote dokumentus ne'ebé atu entrega ba ita:

- Manuál ne'e;
- Formuláriu hirak ne'ebé ita tenke prenxe; no
- Manuál Sekretáriu Estasaun Votasaun nian, ne'ebé inklui instrusaun ba pesoál Estasaun Votasaun.

1.2 Kontinuasaun Manuál ida ne'e nian inklui parte hirak tuir mai:

- Parte 2 - Sentru Votasaun no Estasaun Votasaun sira;
- Parte 3 - Mudansa ne'ebé halo ba prosedimentu eleitorál tanba Covid-19;
- Parte 4 - Ita-nia knaar;
- Parte 5 - Mantein ambiente ne'ebé iha ordén no neutru kona-ba politika;
- Parte 6 - Preparasaun molok loron eleisaun;
- Parte 7 - Fiskais, observadór, monitorizador, no profisionál mídia sira;
- Parte 8 - Votasaun iha loron eleisaun;
- Parte 9 - Kontajen iha loron eleisaun;
- Parte 10 - Rezolve problema no emerjénsia sira.

1.3 Iha pakote ketak ho dokumentu hirak ne'ebé prepara ba eleisaun ne'ebé sei hala'o iha fatin ne'ebé bainbain la hala'o, hanesan iha ospitál, prizaun, no iha fatin ne'ebé ematama ba izolamentu tanba kona, ka suspeita katak kona Covid-19, iha Sentru votasaun Paralelu ne'ebé estabelese iha Díli no iha estranjeiru iha ne'ebé iha votante Timoroan.

Parte 2 - Sentru Votasaun no Estasaun Votasaun sira

2.1 Sentru Votasaun mak fatin ida ne'ebé votante sira ba atu vota. Suku ida-idak iha pelumenus Sentru votasaun ida, maibé Suku balun ne'ebé iha votante barak bele iha liu Sentru Votasaun ida. Sentru Votasaun ida-idak iha "Prezidente" ida ne'ebé iha responsabilidade jerál hodi hala'o eleisaun iha ne'ebá, no Estasaun votasaun ida-idak iha Sekretáriu ne'ebé dirije operasun.

2.2 Estasaun Votasaun mak fatin ida iha Sentru Votasaun nia laran, iha ne'ebé hala'o atividade prinsipál. Espesífiku liu, iha Estasaun Votasaun mak sei konfirma votante ida nia elejibilidade atu vota, simu boletin votu, marka nia votu iha segredu, no hatama iha urna votasaun. Prosesu "rekonsiliaсаun boletin votu" nian mós hala'o iha Estasaun votasaun ida-idak hafoin ramata votasaun. Prosesu hirak ne'e sei deskreve ho detalles kle'an liu iha Parte 7 no 8 iha *Manuál Sekretáriu Estasaun Votasaun* nian. Ita tenke lee Manuál ne'e hotu kedas hodi garante katak ita iha koñesimentu kle'an ba prosedimentu sira ne'ebé espesífika ona.

2.3 Estasaun Votasaun ida-idak:

- iha Sekretáriu ida ne'ebé administra funzionamentu;
- Iha ekipa ofisiál eleitorál no sira-nia knaar detalladu iha *Manuál Sekretáriu Estasaun Votasaun*; no
- iha materiál hotu-hotu ne'ebé nesesáriu, inklui mós lista votante hirak ne'ebé re-senseadu, boletin votu, kabina votasaun no urna votus nian.

2.4 Ita-nia Sentru Votasaun iha kódigu identifikasiаun ho número 5, hodi tulun atu tuir materiál sira. Estasaun Votasaun ida-idak iha ita-nia Sentru votasaun iha kódigu identifikasiаun ho número 9: Número lima (5) primeiru identifika Sentru Votasaun, no número haat (4) ikus identifika Estasaun Votasaun ida-idak. Kódigu hirak ne'e tenke mosu iha urna votu nian, iha lista votantes nian, no mós iha rejistru sira kona-ba prosesu eleisaun, kontajen no apuramento votus nian. Diretór Munisipál STAE nian sei fó hatene ba ita, ita-nia Sentru Votasaun no Estasaun Votasaun sira-nia kódigu. Hafoin simu sira, ita tenke fó hatene ba Sekretáriu, kódigu ba sira ida-idak nia Estasaun Votasaun.

2.5 Maioria Sentru Votasaun iha rai laran iha Estasaun Votasaun ida deit. Maibé fatin sira ho populasaun boot, bele iha Sentru Votasaun ne'ebé iha Estasaun Votasaun barak. Ita-nia knaar sei la hanesan hotu tanba sei depende ba kuantidade Estasaun Votasaun iha ita-nia Sentru votasaun.

- Bainhira iha deit Estasaun Votasaun ida, ita ho Sekretáriu Estasaun Votasaun bele hala'o serbisu nu'udar ekipa ida, maske iha funsaun balun ne'ebé, tuir lei responsabilidade Prezidente Sentru Votasaun ka Sekretáriu Estasaun Votasaun.
- Bainhira iha Estasaun Votasaun barak, ita labele fó apoiu ba Estasaun ida deit durante tempu tomak, maibé tenke fó apoiu ba jestaun no orientasaun ba Estasaun Votasaun hotu-hotu tuir nesesidade.

2.6 Ita responsavel mós ba atividade iha Sentru votasaun ne'ebé laiha relasaun ho Estasaun Votasaun espesífiku ida. Ezemplu ba ne'e inklui:

- simu no rai ho seguransa materiál eleitorál;
- Verifika identidade hosí Sekretáriu Estasaun Votasaun nian sira no verifika kredensiál fiskais, observador no monitorizador sira;

- garante katak Akta Sentru votasaun nian - rejistru formál kona-ba oinsá hala'o eleisaun - hakerek loloos no asina;
- rezolve problema grave seguransa externu nian;
- Dirije kontajen votus nian;
- halo ligasaun ho Diretor Munisipál STAE nian; no
- jere prosesu haruka fila fali materiál ba Sentru Apuramentu Munisipál bainhira ramata loron eleisaun.

2.7 Ita-nia preparasaun ba rejistru ne'ebé loos kona-ba saida mak akontese iha Sentru votasaun mak pontu importante ida ba transparénsia prosesu eleitorál. "Akta" Estasaun Votasaun mak dokumentu importante liu ne'ebé ita tenke kompleta. **Aneksu 1** iha exemplu ba Akta Sentru Votasaun.

Parte 3 - Mudansa ne'ebé halo ba prosedimentu eleitorál tanba Covid-19

3.1 Covid-19 hamosu dezafiu hodi hala'o eleisaun ne'ebé seguro, tanba virus Covid nian hada'et husi ema ida ba ema seluk, diretamente ka indiretamente, no iha loron eleisaun ema barak sei hamutuk durante tempu badak iha fatin sira vota no kontajen ne'ebé iha ema sena-malu.

3.2 Konsellu ikus husi Organizasaun Mundial Saúde nian (OMS) tau fokus maka'as liu ba perigu kona-ba tranzmisaun virus nian liu husi kabeen mihis ne'ebé namlele hela bainhira ita dada-iis, no preokupa liu kona-ba situasaun iha ne'ebé ema halibur iha fatin ne'ebé ladún iha ventilasaun hodi kauza konsentrasaun virus nian. Infelizmente, sala barak ne'ebé uluk uza nu'údar Estasaun Votu iha eleisaun sira iha Timor-Leste tuir situasaun ne'ebé hanesan.

3.3 Tanba ne'e halo mudansa balun kona-ba oinsá Sentru Votasaun uluk funsiona, inklui hirak tuir mai.

- **Ventilasaun** - Tuir possibilidade ne'ebé iha, votasaun sei hala'o iha fatin ne'ebé iha ventilasaun di'ak.
- **Vasinasaun** - Pesoál eleitorál hotu-hotu, monitorizador, fiskais ne'ebé reprezenta kandidatu sira, no observadór (nasionál no internasional) ne'ebé atu tama ita-nia Estasaun Votasaun tenke iha vasinasaun kompletu. (Pesoál eleitorál tenke hatudu prova katak sira simu vasina kompletu, molok simu sira hodi serbisu ba eleisaun, sira seluk tenke hatudu prova bainhira atu simu kredensias ofisiál - hodi nune'e pesoál eleitorál sei la presiza husu prova husi monitorizador, fiskais ne'ebé reprezenta kandidatu sira, no observadór ne'ebé iha kredensias ne'ebé válido.) Ne'e iha intensaun atu la'ós deit fó protesaun ne'ebé di'ak liu kontra infesaun ba pesoál no ba povu, maibé atu hametin fiar povu nian katak votasaun sei seguru.

- **Profisionál sira Mídia nian** - Regra seluk ida sei aplika ba profisionál sira Mídia nian ne'ebé buka atu hetan asesu ba Sentru Votasaun. Bainhira sira hatudu sira-nia dokumentu kredensiais, ne'e sei la suficiente hodi permite sira atu tama iha Sentru Votasaun; sira tenke mós apresenta prova katak sira simu ona vasina kontra Covid, ka se la'e , prova katak sira halo teste loron lima molok eleisaun no rezultadu negativu.
 - **Luvas no máskara** - ofisiál eleitorál sira sei tau luvas ho máskara iha ne'ebé de'it iha Sentru Votasaun nia laran. Fiskais, obzervador, monitorizador no profisionál mídia sira mos tenke tau luvas no máskara, ne'ebé (sujeitu ba disponibilidade luvas no máskara) sei fornese ba sira ne'ebé mai la lori sira-nian rasik. STAE mos sei tenta atu fornese luvas no máskara ba votante hotu-hotu, maibe dala ida tan ne'e sei sujeitu ba disponibilidade.
 - **Dezinfeta liman** - Ema hotu-hotu ne'ebé atu tama ba iha Estasaun Votasaun tenke dezinfeta sira-nia liman molok atu tama; STAE sei fornese dezinfetante.
 - **Transfere votante sira ba iha sentru izolamentu hodi vota** - Sub-artigu 16(f) no (g) iha Dekretu Governu No. 7/2017 (*Regulamentu Prosedimentu Votasaun, kontajen votos no Determinasaun Rezultadu nian*) tuir emenda iha 2022, kontempla eskema iha ne'ebé votante hirak ne'ebé iha sintoma Covid nian prevene atu tama iha Estasaun Votasaun. Espesífiku liu, Dekretu ne'e inklui knaar hirak tuir mai iha lista ba knaar Prezidente Sentru Votasaun nian:
 - “(f) Notifika autoridade competente iha Ministériu Saúde no responsavel PNTL ne'ebé iha fatin, tuir propózitu ne'ebé preve iha dokumentu legál ne'ebé introduís medidas vijilânsia temporariu no exesonál hodi hatán ba moras pandémia Covid19, katak eziste votante ne'ebé apresenta ho sintoma ne'ebé hanesan ho infesaun Covid19, tuir deskrisiaun iha dokumentu legál;
 - (g) Notifika responsavel ba sentru izolamentu terapéutiku obrigatórioi ne'ebé be-sik liu Sentru Votasaun, katak transfere ba sentru ne'ebá, sidadaun hirak ne'ebé positivu ba Covid19, hafoin halo teste tuir termu ne'ebé estipula iha sub-parágrafo iha leten, hodi sira bele ezerse sira-nia direitu atu vota, hafoin halo rejistru manuál iha lista adisionál sentru izolamentu nian no hasai sira-nia naran husi lista votantes iha sentru votasaun iha ne'ebé tuir loloos sira atu vota;”
- Se arranju sira halo atu implementa eskema ne'e, Koordenadór Munisipál STAE nian sei fó tan detalles kona-ba oinsá prosesu ne'e sei hala'o.

Parte 4 - Ita-nia knaar

- 4.1 Tuir lei ita iha funsaun espesífiku balun, ne'ebé inklui hirak tuir mai.
- Deklara katak Sentru Votasaun loke, verifika identidade hosi Sekretáriu Estasaun Votasaun sira nian, no verifika kredensiál fiskais, observador no monitorizador sira.

- Asegura funzionamentu di'ak Sentru votasaun nian tuir lei no regulamentu hirak ne'ebé iha vigor.
- Fó orden hodi taka lista kandidatu sira nian iha fatin tama ba Sentru votasaun.
- Fornese informasaun no orientasaun ne'ebé nesesáriu hodi hala'o loloos prosesu eleitorál iha Sentru votasaun.
- Suspende prosesu eleitorál karik iha disturbio/perturbasaun, agresaun ka violénsia iha Sentru votasaun ka besik loos.
- Uza ita-nia “votu desizivu” bainhira nesesáriu hodi rezolve asuntu ruma, tuir diskusaun iha parágrafu 7.10 no 7.11 iha kraik.
- Asina Akta Sentru Votasaun.
- Organiza kandidatu sira nia fiskais atu asina Akta Sentru votasaun.
- Anunsía rezultadu kontajen nian no taka kópia rezultadu nian iha fatin ne'ebé hotu-hotu bele haree, iha Sentru votasaun nia laran.
- Garante katak haloot materiál eleisaun hotu-hotu no haruka ba Sentru Apuramentu Munisipál no Rejonál.
- Implementa knaar seluk ruma ne'ebé haknaar ba ita tuir lei, regulamentu ka orden superior ne'ebé la'ós orgaun ida seluk nia responsabilidade.

Parte 5 - Mantein ambiente ne'ebé iha ordén no neutru kona-ba politika

5.1 Iha dispozisaun legál oin-oin ne'ebé elebora hodi garante katak operasaun iha loron eleisaun la'o tuir ordén no neutru kona-ba politika.

- Votante hirak ne'ebé ita haree momoos katak lanu ka drogadu, hirak ne'ebé lori kro'at ruma ka uza meius ne'ebé deit hodi halo perturbasaun ba ordén no dixiplina, la permite atu tama ba iha Sentru Votasaun.
- Labele hemu ka fa'an alkol to'o metro 100 husi Sentru votasaun.
- Votante sira ne'ebé vota tiha ona la permiti atu tama iha Sentru Votasaun, anaunser sira ne'e fiskais, profisionál mídia ka observadór ka monitorizador akreditadu sira.
- Iha loron eleisaun, proibidu atu tau naran propaganda eleitorál ruma iha Sentru Votasaun nia laran, ka to'o metru 100 husi Sentru Votasaun. “Propaganda Eleitorál” inklui *stickers*, kamizola, pamfletu, símbolu, plaka, medalla, kartás no estandarte (span-duk), no seluk tan, no mós atividade hirak ne'ebé promove kandidatu ida. Karik ita

iha koñesimentu ka hatene kona-ba propaganda ruma ne'ebé tau iha fatin ida, fahe ka hato'o ba votante sira tuir dalan ilegal, ita tenke fó hatene ba ajente PNTL iha fatin, ne'ebé sei hala'o asaun hodi rezolve.

- Fiskais labele hatudu símbolu ka objetu ruma ne'ebé halo ligasan entre sira no kandidatu. Karik fiskal ruma hatudu símbolu ka objetu ruma, Sekretáriu Estasaun Votasaun sei haruka hasai. Karik nia rekuza atu hasai, Sekretáriu sei refere asuntu ne'e ba ita. Ita sei repete fila fali instrusaun ba fiskal, no karik dala ida tan nia rekuza atu koopera, ita tenke fó orden ba nia atu entrega nia kredensiais no atu sai husi Sentru votasaun. Ita tenke hakerek insidente sira hanesan ne'e iha Akta Sentru votasaun nian, inklui detalles fiskal nian, no iha sa oras insidente akontese.
- Bainhira sira serbisu hela, membru forsa defeza no forsa polisia nia prezensa iha Sentru votasaun proibidu, bainhira votasaun hala'o hela (sira iha autorizasaun atu tama bainhira votasaun ramata iha Estasaun Votasaun hotu-hotu iha Sentru Votasaun nia laran, no mós durante prosesu kontajen). Membru sira PNTL nian tenke hela dook pelumenus metro 25 husi Sentru votasaun.
- Maibe ita bele husu membru PNTL atu tama ba iha Sentru Votasaun karik:
 - nesesáriu hodi hapara disturbiu ka atu prevene agresau ruma ka violénsia iha Sentru votasaun, Estasaun Votasaun ka iha área ne'ebé hale'u; ka
 - ita fó orden ba ema ida, no ema ne'e la halo tuir.

Molok atu halo pedidu ida hanesan ne'e, ita tenke halo konsulta ho Sekretáriu Estasaun votasaun, ka ho Sekretáriu ida husi Estasaun Votasaun sira.

- Bainhira halo pedidu ba prezensa PNTL nian, tenke halo liuhusi kontaktu ho membru PNTL ne'ebé besik hela Sentru Votasaun, ka, karik laiha, liuhusi kontaktu ho Koman-dante Munisipál PNTL nian.
- Bainhira ajente PNTL presente iha Sentru Votasaun, atividade votasaun tenke sus-pende lai. Votasaun hahú fila fali bainhira rezolve problema, no Sekretariu sira Es-tasaun Votasaun fó hatene ba ita katak sira prontu atu hahú fila fali.
- Ita tenke hakerek iha Akta Sentru Votasaun nian, razaun tanbasá ita halo pedidu, tempu hira mak PNTL presente (ka karik la konsege marka prezensa), no oras ne'ebé suspende ho hahú fila fali votasaun.

5.2 Ita mak responsavel, ho apoioi husi pesoál Sentru Votasaun no Estasaun Votasaun nian, atu atensaun beibeik ba hahalok ne'ebé konstitui komportamentu aat ka la tuir lei. Ita labele laran-rua atu husu asisténsia husi membru PNTL atu rezolve.

Parte 6 - Preparasaun molok loron eleisaun

6.1 Iha loron eleisaun, importante tebes katak Sentru Votasaun prontu atu serbí votante sira husi tuku 07:00 dadeer, tanba votasaun tenke la'o durante oras 8, hodi garante katak ema hotu-hotu hetan oportunidade atu vota. Tanba ne'e, iha preparasaun balun ne'ebé tenke hala'o **molok** loron eleisaun.

Dezeñu Sentru Votasaun

6.2 Tuir lei, STAE tenke publika fatin Sentru Votasaun pelumenus loron 30 molok loron eleisaun, no iha posibilidade atu halo mudansa ba fatin hirak ne'ebé publika, to'o loron 10 molok loron eleisaun. Diretór Munisipál STAE nian bele husu ita atu tulun hodi halo inspesaun no hili fatin hirak ne'e. Bainbain sei identifika edifisiu ka fatin ida: hanesan exemplu eskola ka gabinete governu nian. Fatór seluk ne'ebé tenke konsidera inklui:

- Estrada/dalan asesu nian;
- diponibilidade eletrisidade nian;
- rede telekomunikasaun;
- anin sirkula no ventilasaun di'ak hodi prevene konsentrasaun virus iha anin ne'ebé dada iis;
- tamañu sala sira nian (prefere liu sala boot);
- posibilidade katak minimu votante bele to'o ema na'in 50 sei mai; no
- disponibilidade ema atu hulan sasán.

6.3 Ita tenke fó atensaun hodi garante katak iha pelumenus Estasaun Votasaun ida iha Sentru Votasaun nia laran, sei fó asesu di'akliu tuir posibilidade ba votante ho defisiénsia sira. Fatór ne'ebé influensia asesu inklui (maibé la limitadu ba):

- Tipu eskada nian;
- Fatin tama no sai nia luan;
- oinsá espesifika fatin liña votasaun nian;
- prezensa obstáku sira nian; no
- oinsá tau kabina vota no urna votu nian.

6.4 Hafoin determina fatin, ita iha responsabilidade, atu serbisu tuir kooperasaun ho Sekretáriu (Sekretáriu sira) Estasaun Votasaun nian, atu:

- vizita no fó volta fatin ne'e hodi koñese didi'ak fatin, karik ita seidauk halo; no
- halo planu kona-ba oinsá atu hadia Sentru votasaun.

Ita tenke buka atu halo lalais liu hafoin publikasaun lokál sira Sentru Votasaun nian, hodi nune'e ita iha tempu barak liu atu rezolve problema ruma ne'ebé ita hetan. Karik ita hanoin katak fatin ne'ebé hili iha problema boot, ne'ebé halo katak sei labele uza iha loron eleisaun, ita tenke fó hatene kedes ba Diretor Municipal STAE nian hodi bele hanoin atu uza fatin alternativu. Karik ita iha koñesimentu kona-ba problema ruma ne'ebé mosu hafoin ita hala'o vizita ba dala uluk- hanesan exemplu udan boot ka bee sa'e kauza estragus -ita tenke fó hatene kedes ba Diretor Municipal STAE nian.

6.5 Ita no pesoál Estasaun Votasaun nian tenke to'o iha Sentru Votasaun loron ida molok loron eleisaun. Fita tau marka fatin iha ne'ebé votante sira atu halo liña votasaun tenke kesiba iha ai-hedi , no karik bele kesi fita ka buat ruma hodi marka fatin iha ne'ebé ema tenke hambriik hodi bele mentein distansiamentu sosiál pelumenus metru 1. Karik iha Estasaun Votasaun barak, importante atu garante katak identifika didi'ak fatin liña votasaun ba ida-idak nia tama fatin.

6.6 Estasaun Votasaun ida efikas liu bainhira iha fatin tama no sai ne'ebé ketak, hodi nune'e votante sira bele tuir etapa ida-idak prosesu votasaun nian avontade, hanesan hatudu iha kraik. Karik bele, ita tenke buka atu hadia ita-nia fatin hanesan ne'e.



6.7 Ita-nia planu Sentru Votasaun nian tenke identifika sala ida hodi hala'o kontajen. Hafoin ne'e ita bele halo planu kona-ba, iha ne'ebé mak atu tau mobiliáriu, pozisaun fiskais, observadór no monitorizador sira; iha ne'ebé atu taka formulariu kontajen iha ne'ebé atu marka ne'ebé korresponde ba votu ba kandidatu ida-idak; no halo butuk keta-ketak ba boletin votu hirak ne'ebé sura no la sura.

6.8 Sala hirak ne'ebé uza hodi sura votus bainbain iha ema sena malu, no prosesu kontajen envolve hateten sai ho lian maka'as votu iha boletin votu ida-idak. Tanba ne'e sala hirak ne'e sai fatin ho perigu boot liu ba tranzmisaun Covid nian iha prosesu eleitorál tomak. Nune'e duni, ita tenke hili sala ne'ebé iha ventilasaun di'akliu. Karik iha sala balun ho ventilasaun di'ak, hili ida ne'ebé boot liu.

Pesoál

6.9 Pesoál atu serbisu iha Sentru Votasaun tenke nomeia no emprega ona (fó serbisu ba). Tenke iha planu rezerva hodi kobre perigu katak pesoál ruma derrepente la mosu. Halo nomeasaun ba no fó serbisu ba pesoál responsabilidade Diretor Munisipál STAE nian. Ita tenke asegura katak ita iha detalles kontaktu ba pesoál hotu-hotu ne'ebé atu serbisu iha Estasaun votasaun, inklui mós pesoál rezerva sira nian.

Treinu

6.10 Pesoál hotu-hotu sei tuir treinamentu. Maneira oinsá hala'o treinamentu sei la hanesan iha rai laran tomak. Ita sei simu tan informasaun no instrusaun kona-ba planu treinamentu nian husi Diretor Munisipál STAE nian.

6.11 La importa metudo ne'ebé ita uza hodi hala'o treinamentu, maibé ita mak responsavel hodi hala'o treinamentu ne'ebé di'akliu tuir possibilidade ba pesoál hotu-hotu iha itania Sentru Votasaun no Estasaun Votasaun (sira). Ita tenke asegura katak pesoál hotu-hotu partisipa iha sesaun sira treinamentu nian no katak sira komprende didi'ak knaar ne'ebé sira atu hala'o iha loron eleisaun.

Simu ekipamentu no materiál sira

6.12 Molok hahú votasaun, STAE tenke haruka ona ekipamentu no materiál hotu-hotu ne'ebé presiza iha Sentru Votasaun hotu-hotu iha rai laran. Maneira oinsá sira atu haruka ekipamentu no materiál hirak ne'e, sei la hanesan iha rai tomak. Ita sei simu informasaun no instrusaun husi Diretor Munisipál STAE nian kona-ba planu atu halo entrega ekipamentu no materiál nian, no mós kona-ba rekizitu hirak ne'ebé nesesáriu hodi tau iha rai-fatin ne'ebé seguru to'o loron eleisaun. Ita tenke garante katak halo tuir no implementa instrusaun kompletu hodi rai materiál sira iha rai-fatin seguru.

6.13 Karik materiál la to'o tuir oras ne'ebé ita antisipa ona tuir informasaun hosi Diretor Munisipál STAE, ita tenke kontaktu Diretor Munisipál STAE no fo hatene nia kona-ba ne'e.

6.14 Materiál ne'ebé STAE atu fornese, iha kategoria rua.

- Materiál “**Sensitivu**” mak sasan hirak ne'ebé, karik na'ok ka uza sala, bele prejudika integridade prosesu eleitorál nian. Kategoria ne'e inklui boletin votu nian, urna votu

sira nian, xavi seguransa urna votu nian, tinta indelével, no lista votantes nian. Materiál sensitivu tenke rai iha fatin seguru no kontroladu.

- Materiál “La-sensitivu”, maske importante hodi garante prosesu eleitorál ne’ebé seguru no la’o ho di’ak, sei labele uza sala hodi estraga integridade jerál eleisaun nian. Ezemplu inklui dezinfetante liman nian, luvas, no máskara.

6.15 Lista materiál nian ne’ebé atu fahe ba Estasaun Votasaun ida-idak inklui iha *Manuál ba Sekretáriu Estasaun Votasaun nian*. Materiál adisionál ne’ebé atu fornese hodi uza iha Sentru votasaun - hanesan, Surat tahan boot sura votus nian - inklui iha **Aneksu 2**.

Loron ida molok eleisaun

6.16 Loron ida molok eleisaun reprezenta oportunidade ikus atu rezolve problema boot ne’ebé sei iha, ne’ebé bele interfere ho serbisu Sentru Votasaun no Estasaun Votasaun nian. Ita deve organiza ho ita-nia Sekretáriu ka Sekretáriu sira Estasaun Votasaun nian atu halo enkontru sedu liu tuir possibilidade iha loron ne’e, hodi konfirma katak buat hotu-hotu ne’ebé nesesáriu prontu tiha ona, no karik seidauk, hodi halo akordu kona-ba asaun urjente hodi hadi’akproblema sira.

6.17 Iha loron ne’e, ita no pesoál Estasaun votasaun nian tenke tau fita hodi hatudu dalam liña votasaun votante sira nian iha loron eleisaun. (Karik, tanba razaun ruma labele halo, iha loron molok eleisaun, tenke halo molok tuku 06:00 dadeer iha loron eleisaun.)

Parte 7 - Fiskais, observadór, monitorizador, no profisionál mídia sira

7.1 Alem de votantes no pesoál sira eleitorál nian, ema ho kategoria hirak tuir mai mós iha direitu legal atu presente iha Estasaun Votasaun nian hodi garante transparénsia no kredebilidade prosesu eleitorál nian, no parte importante ida ita-nia knaar nian mak atu garante katak sira bele hala’o sira-nia knaar ho efikásia:

- fiskais hirak ne’ebé simu nomeasaun husi kandidatu sira no hetan kredensias husi STAE hodi halo fiskalizasaun ba eleisaun no kontajen;
- observadór independente (husi Timor-Leste no husi rai seluk) ne’ebé hetan kredensias husi STAE;
- sira ne’ebé akompaña prosesu - ne’ebé CNE haruka tuir sira-nia knaar atu hala’o supervizaun ba prosesu eleitorál tomak;
- monitorizador sira ne’ebé akompaña prosesu ne’ebé mai husi organizasaun seluk governu nian, ne’ebé hetan kredensias husi STAE; no

- profisionál mídia sira nian ne'ebé hetan kredensiais husi STAE no apresenta prova katak sira simu ona vasinasau kompletu kontra Covid, ka se la'e, prova katak sira halo teste loron lima molok eleisaun no rezultadu negativu.

7.2 Hanesan hakerek uluk ona, ema hotu-hotu iha kategoria hirak ne'e tenke iha vasi-nasaun kompletu kontra Covid, no tenke uza luvas no máskara bainhira iha Sentru Votasaun nia laran. Sira tenke mós manteindistansiamentu sosiál pelumenus metru 1 husi ema seluk. Karik ema ruma la kumpre ho rekizitu hirak ne'e, ita tenke haruka sira atu sai husi Sentru votasaun.

Fiskais

7.3 Kandidatu ida-idak bele hili fiskal ida no substitutu ida ba Estasaun votasaun ida-idak iha ita-nia Sentru votasaun, no fiskal ida no substitutu ida ba Sentru Votasaun tomak. Bainhira hala'o votasaun no kontajen, ida deit mak bele prezente. Fiskal iha direitu jerál hirak tuij mai:

- akompaña oinsá hala'o prosesu votasaun, husi bainhira estabelese Sentru Votasaun no Estasaun votasaun, to bainhira taka;
- hato'o pergunta ba ita, no hetan resposta husi ita, durante hala'o prosesu votasaun;
- akompaña, ho nia transporte rasik, bainhira hala'o transporte urna votus no materiál seluk Sentru Votasaun ka Estasaun Votasaun nian;
- akompaña prosesu kontajen votus no apuramentu rezultadu sira nian;
- asina Akta Estasaun votasaun, no Sentru Votasaun nian, no halo nota kona-ba dokumentu hotu-hotu ne'ebé relasiona ho prosesu votasaun no kontajen ne'ebé nia tuij;
- apresenta keixa no reklamasaun durante prosesu eleitorál; no
- hato'o keixa no reklamasaun ba CNE.

7.4 Fiskais hetan kredensias husi STAE ba Sentru votasaun ka Estasaun Votasaun espesíiku ida, no sira-nia dokumentu kredensias nian sei inklui mós Sentru Votasaun ka Estasaun Votasaun nia número kódigu nian.

7.5 Tuir lei, Fiskais sira tenke:

- mantein imparsialidade bainhira hala'o sira-nia knaar, la'ós buka atu fó benefísiu ba kandidatu ne'ebé sira reprezenta;
- labele uza símbulu ka buat seluk ne'ebé iha ligasaun ho kandidatu ne'ebé sira reprezenta;

- respeita Konstituisaun, lei no regulamentu hirak ne’ebé aplika;
- halo kooperasaun ho fiskais seluk hodi nune’e prosesu eleitorál hala’o tuir dalan ne’ebé transparente no organizadu; no
- hatudu sira-nia kartaun kredensias nian (haree iha kraik) bainhira ofisiál elitorál ka autoridade kompetente seluk husu.

	ELEISAUN PREZIDENSIAL 2022	
	STAE :	/ / 2022
NARAN : _____ _____ NÚ K. ELEITORAL : _____ KANDIDATU : _____ MUNISIPIU : _____ NARAN CV : _____ ESTASAUN VOTU : _____		
3X4	Dili, ___/___/2022 Acilino Manuel Branco <small>Diretor Jeral STAE</small>	
FISKAIS KANDIDATURA		

Fiskais sira labele buka atu influensía votante sira, ka atu tau presaun ba ka halo intimidasaun ba pesoál eleitorál.

Observadór no monitorizador sira

7.6 Observadór no monitorizador eleitorál sira iha direitu ne’ebé atu hanesan, no tenke tuij regulamentu hirak ne’ebé atu hanesan ho fiskais sira, menus hirak ne’ebé tuij mai.

- Observadór no monitorizador sira hetan kredensias atu hala’o observasaun iha Sentru Votasaun ne’ebé deit, la’ós iha ida deit.
- Sira labele halo interferénsia ho, ka hanetik prosesu eleitorál, no liuliu, sira labele buka atu fó instrusaun ka orden ruma ba pesoál eleitorál sira.
- Maske sira bele husu ita atu halo klarifikasiun kona-ba aspetu ruma prosesu eleitorál nian, sira laiha direitu atu halo keixa ka reklamasaun (maibé observadór no monitorizador sira husi Timor-Leste ne’ebé vota iha ita-nia Estasaun Votasaun iha direitu atu halo keixa nu’udar votante ida).

- Sira iha direitu atu hetan asesu ba, no hasai foto ba atividade no dokumentu ofisiál ruma kona-ba prosesu eleitorál (maibé, labele halo tuir dalan ne'ebé la hatudu respeitu ba votante sira, ka ba segredú votu nian).

7.7 Observadór sira sei iha dokumentu kredensias husi STAE, no supervizador hirak husi CNE sei iha kartaun identifikasiáun husi CNE. Monitorizadór sira husi organizasaun seluk sei iha kredensias husi STAE. Bele haree exemplu iha ne'e.

 ELEISAUN PREZIDENSIAL 2022 STAE : _____ / _____ / 2022	
NARAN : _____ _____ _____	
Nú K. Eleitoral : _____ _____	
Naran Organizasaun : _____ _____	
3X4	Dili, ____/____/2022 <u>Acilino Manuel Branco</u> Diretor Jeral STAE
OBSERVADOR	

 ELEISAUN PREZIDENSIAL 2022 STAE : _____ / _____ / 2022	
NARAN : _____ _____ _____	
Nú Pasporte : _____ _____	
Naran Organizasaun : _____ _____	
3X4	Dili, ____/____/2022 <u>Acilino Manuel Branco</u> Diretor Jeral STAE
OBSERVADOR INTERNACIONAL	

 ELEISAUN PREZIDENSIAL 2022 STAE : _____ / _____ / 2022	
NARAN : _____ _____ _____	
Nú K. Eleitoral : _____ _____	
Organizasaun : _____ _____	
3X4	Dili, ____/____/2022 <u>Acilino Manuel Branco</u> Diretor Jeral STAE
MONITORIZADOR	



7.8 Nu'udar Prezidente Sentru Votasaun nian, ita tenke garante katak laiha interferénsia ba atividade lejitimu observadór no sira ne'ebé akompanha prosesu nian. Karik mosu disputa ruma kona-ba observadór no sira ne'ebé akompanha prosesu nia direitu no obrigasaun, Sekretáriu Estasaun Votasaun sei refere kazu ne'e ba ita atu rezolve.

Profisionál Mídia sira nian

7.9 Profisionál mídia sira nian identifika liu husi dokumentu kredensias ne'ebé STAE fó, exemplu sira ne'ebé hatudu iha ne'e.

 <p>ELEISAUN PREZIDENSIAL 2022</p> <p>STAE : _____ / _____ / 2022</p>	
<p>NARAN : _____ _____</p> <p>Nú. K. Eleitoral : _____</p> <p>Naran Media : _____</p> <p>-- -- -</p>	
<p>3X4</p>	<p>Dili, ___ / ___ / 2022</p> <p><u>Acilino Manuel Branco</u> Diretor Jeral STAE</p>
<p>MEDIA NASIONAL</p>	

 STAE <small>STATE AUDIT INSTITUTE</small>	<p style="text-align: center;">ELEISAUN PREZIDENSIAL 2022</p> <p>STAE : _____ / _____ / 2022</p> <p>NARAN : _____ _____</p> <p>Nú. PASSAPORTE : _____</p> <p>Naran Media : _____</p> <p style="text-align: right;">Dili, _____ / _____ / 2022</p> <p style="text-align: right;"> <u>Acilino Manuel Branco</u> Diretor Jeral STAE </p>	
MEDIA INTERNASIONAL		

Sira iha direitu atu hetan asesu ba Sentru Votasaun no Estasaun Votasaun hodi haree votasaun no kontajen. Molok atu tama, sira tenke hetan ita-nia autorizasaun, hodi evita katak la interrompe prosesu votasaun ka kontajen nian. Sira tenke mós hatudu provas katak simu vasinasaun kompletu kontra Covid, se la'e provas katak sira halo teste negativu loron lima molok loron eleisaun. tenke kumpre ho lei hotu-hotu ne'ebé relasiona ho hahalok iha Sentru Votasaun, no, liuliu, sira tenke:

- respeita ema seluk nia privasidade;
 - labele interfere ho prosesu eleitorál, no liuliu, labele husu pergunta ka halo entrevista ba ema iha Estasaun Votasaun nia laran;
 - labele hasai foto ka rekolla informasaun ne'ebé kompromete ka prejudika segredu votu nian; no
 - durante kontajen votus nian, labele interfere iha prosesu, no halo deit reportajen kona-ba rezultadu kontajen nian, tuir informasaun husi STAE.

Karik profisionál mídia sira nian hakarak foti filme iha ita-nia Sentru votasaun nia laran, ita tenke fasilita, hodi halo tuir dalan ne'ebé respeita votante sira, la interfere ho operasaun iha Sentru votasaun, no proteje segredú votu nian.

Kestionau, reklamasaun no protestu

7.10 Dala ruma, votante ka fiskais buka atu kestionau desizaun hirak ne'ebé ita ka ita-nia pesoál ida halo. Dala barak sira kestionau tanba sira la komprende, nune'e duni, karik ema ruma kestionau ita ka hato'o reklamasaun ruma ba ita (ka Sekretáriu Estasaun Votasaun ida refere ba ita), primeiru ita tenke buka atu rezolve asuntu ne'e ho esplikasaun kompletu no klaru, kona-ba tanbasá foti desizaun ne'e.

7.11 Hafoin halo esplikasaun, ita tenke husu ema ne'ebé halo keixa karik nia hakarak halo keixa formál. Karik nia hakarak, Lei Eleisaun Prezidensiál iha prosesu espesífiku ne'ebé ita tenke tuir hodi rezolve.

- Kestaun ne'e submete ba votasaun husi pesoál eleitorál - ne'e inklu ita, no (husi Estasaun Votasaun iha ne'ebé asuntu ne'e mosu) Kontroladór liña votasaun nain 2, Ofisiál identifikasiacaun nain 4, kontroladór Boletin votu, Kontroladór Urna Votasaun, no Kontroladór Tinta Indelével. Iha votu ne'e, sira ida-idak tenke hatete sai katak simu ka la simu keixa ne'e; la'ós nesesáriu halo votu "sekretu". Presiza votu a favór husi nain neen hodi konsidera katak simu keixa ne'e. (Maske, tanba razaun ruma pesoál nain 11 la prezente hotu, sei presiza nafatin votu a favór husi nain 6 hodi bele konsidera katak simu keixa ne'ebé halo.) Ita bele halo konsulta ho STAE karik presiza orientasaun kona-ba oinsá atu derije prosesu ne'e. Tenke konvida fiskais, observadór no monitorizator sira ne'ebé prezente atu observa prosesu ne'e.
- Komunika desizaun ba ema ne'ebé halo keixa, no karik nia hakarak, bele hato'o keixa ba CNE. Keixa hamutuk ho dokumentu relevante hotu-hotu, tenke submete tuir eskrita ba reprezentante CNE iha Sentru votasaun ka Estasaun Votasaun ne'ebé refere, no haruka ba Sentru Apuramentu Munisipál hamutuk ho dokumentu hotu-hotu kona-ba Sentru votasaun ne'ebé refere.
- Hafoin ne'e, CNE sei foti desizaun kona-ba keixa, no sujeitu atu hetan revizaun husi Tribunál Rekursu.

Karik keixa ruma refere ba atividade iha Estasaun Votasaun espesífiku ida, Sekretáriu Estasaun Votasaun tenke hakerek iha Akta Estasaun Votasaun nian:

- detalles kona-ba keixa formál ruma, inklui oras ne'ebé hatama no oinsá rezolve liu-husi prosedimentu hirak ne'e, no mós número totál keixa nian; no
- número totál votu ne'ebé simu ka la simu keixa (la inklui oinsá ofisiál eleitorál ida-idak vota).

Karik keixa ida la refere ba atividade iha Estasaun Votasaun espesífiku ida, Ita tenke hakerek informasaun ne'ebé hanesan, iha Akta Sentru votasaun.

Parte 8 - Votasaun iha loron eleisaun

8.1 Em jerál votasaun hala'o hanesan tuir mai.

- Tuir Lei Eleisaun Prezidénsiál, tuir votasaun direitu no "dever síviku".
- Tuir lei, idade legal hodi vota tinan 17 (to'o iha loron eleisaun). Votante ne'ebé kompleta tinan 17 iha loron entre 1^a volta no 2^a volta eleisaun prezidensiál nian, bele vota iha eleisaun 2^a volta, maibé labele vota iha eleisaun 1^a volta.
- Votasaun iha Estasaun Votasaun hala'o husi tuku 07:00 dadeer to'o tuku 15:00 lorkraik. Votante hirak ne'ebé iha ona liña votasaun laran iha tuku 15:00 sei bele vota.
- Votante sira tenke entrega sira-nia kamera (inklui telemóvel nian) bainhira sira tama iha Estasaun Votasaun. Ne'e atu garante katak mantein segredru votu nian.
- Hodi bele vota, votante sira tenke resenseadu. Votante ida-idak rejista ka tuir resenseamentu iha suku ne'ebé nia hela ba. Bainhira votante ida tuir resenseamentu, nia sei simu kedes kartaun eleitorál ne'ebé inklui nia informasaun pesoál, fotografia no impresaun digitál liman fuan boot nian, no ne'e inklui iha baze dadus, husi ne'ebé imprime lista votantes ba suku ida-idak.
- Iha loron eleisaun, votante tenke hatudu nia kartaun eleitorál, no dadus kartaun nian tenke hanesan ho dadus iha lista votantes Estasaun Suku nian.
 - Ema ne'ebé laiha kartaun eleitorál hodi hatudu, bele apresenta nia billete identidade Timor nian ka nia pasaporte Timor válidu, maibé dadus iha billete identidade ka pasaporte tenke hanesan ho dadus iha lista votantes nian ba suku ne'e. (Votante sira ne'ebé rejista ona atu vota iha Sentru Votasaun Paralelu ida iha Díli sira-nia naran sei la mosu iha lista votante suku ne'e nian, no tan ne'e sei labele vota uza mekanizmu ne'e.)
 - Ema ne'ebé iha kartaun eleitorál ne'ebé válido ba suku Estasaun Votasaun nian, maibé nia naran la mosu iha lista votantes nian ba suku ne'e, bele vota nafatin. Iha kazu hanesan ne'e, inklui nia naran iha "lista adisionál". (Idane'e la aplika ba votante sira ne'ebé sira-nia naran hasai tiha ona hosi lista votante ba suku ne'e tanba sira rejistru ona atu vota iha Sentru Votasaun Paralelu ida iha Díli.)
- Regra espesiál ida aplika ba membru sira forsa defeza, membru sira forsa seguransa nian, fiskais, funtionáriu públiku ka ajente administrasaun pública ne'ebé fó apoiu ba administrasaun eleisaun nian: sira bele vota iha Sentru Votasaun ne'ebé besik liu fatin iha ne'ebé sira serbisu. Direitu ne'ebé hanesan kobre mós observadór no monitorizador, profisionál mídia ne'ebé halo kobertura ba eleisaun ka pesoál lokál husi diplomátika ida (ne'ebé fó apoiu ba diplomata husi estranjeiru ne'ebé hala'o observasaun ba prosesu eleisaun). STAE sei fó lista ho naran votante resenseadu hirak ne'ebé tuir kategoria hirak ne'e, ne'ebé bele vota iha ita-nia Sentru Votasaun. Karik

tanba razaun ruma lista ne'e la disponivel, detalles votante hirak ne'e nian tenke inklui iha "lista adisionál" votante sira nian.

- Ofisiál sira votasaun nian verifika votante nia tinan hodi garante katak votante tinan 17 ona iha loron eleisaun.
- Verifika votante nia liman hodi garante katak laiha marka tinta indelével ne'ebé hatudu katak nia vota tiha ona.
- Ofisiál votasaun asina no tau karimbu iha boletin votu nia kotuk hodi hatudu katak emite tuir dalan ne'ebé válido, no entrega ba votante.
- Hafoin simu, votante ba iha kabina votasaun ne'ebé mamuk, iha ne'ebé ema seluk labele haree, no marka ka halo ko'ak iha kuadradu ne'ebé iha kandidatu ne'ebé nia hakarak hili nia sorin iha boletin votu.
 - Votante ne'ebé ho defisiénsia matan ka la konsege marka nia boletin votu rasik tanba iha defisiénsia fizika ruma bele simu asisténsia husi votante seluk ne'ebé nia rasik hili. (Sekretáriu Estasaun Votasaun, tenke verifika katak ema ne'ebé atu fó asistensia, votante mak hili rasik.)
 - Nu'udar alternativa, votante ne'ebé ho defisiénsia matan bele hili atu uza "formatu" ne'ebé fornese husi STAE (karik iha), ne'ebé permite sira (liuhusi buka ho liman) atu hetan kuadradu iha boletin votu ne'ebé sira tenke marka ka halo ko'ak hodi vota ba kandidatu ne'ebé sira hili.
- Votante ne'ebé estraga ka marka sala nia boletin votu, iha direitu atu entrega fila fali hodi simu boletin foun.
- Hafoin votante hatama nia boletin votu iha urna votus nian, nia limanfuan ida sei marka ho tinta indelével hodi hatudu katak nia vota tiha ona. Hafoin ne'e votante husik hela Estasaun Votasaun.

8.2 Hanesan hakerek uluk ona, atividade hirak ne'e hala'o iha Esatasaun Votasaun, tuir prosedimentu detalladu ne'ebé elabora iha *Manuál ba Sekretáriu Estasaun Votasaun*. Parte hirak tuir mai sei tau foku ba funsaun hirak ne'ebé ita ho pesoál ne'ebé ita kontrola diretamente tenke hala'o.

Preparasaun molok atu loke votasaun (06:00 to 07:00)

8.3 Atividade sira iha Sentru Votasaun hahú iha tuku 06:00 dadeer, no pesoál hotu-hotu tenke iha fatin.

- Iha tuku 06:00 dadeer, ita tenke konfirma identidade Sekretáriu sira Estasaun Votasaun sira nian.

- Ita tenke mós konfirma katak fiskais sira laiha símbolu ka objetu ruma ne'ebé halo ligasaun ho kandidatu ida. Karik sira ida iha símbolu ka objetu ruma no la hatan atu hasai, ita tenke hasai nia kredensiais no hasai nia husi Sentru votasaun (no hakerek rejistru ida kona-ba asaun ne'ebé ita hala'o).
- Sekretáriu sira Estasaun Votasaun nian tenke fó hatene ba ita to'o tuku 06:30 dadeer karik ofisiál eleitorál ruma la marka prezensa, hodi nune'e ita bele hahú prosedimentu atu buka ema seluk hodi taka nia fatin. Iha tuku 06:35 dadeer, ita tenke fó hatene ba Diretor Municipal STAE nian, naran husi pesoál ne'ebé la mosu, no husu ema seluk hodi taka nia fatin. Diretor Municipal STAE nian sei nomeia naran votante ida ho reputasaun di'ak ne'ebé ema barak koñese, ho akordu husi ofisiál eleitorál sira ne'ebé prezente, hodi substitui nia. Substituisaun hirak ne'e tenke hakerek hotu iha Akta Estasaun Votasaun no Sentru votasaun nian. Hafoin halo substituisaun, nomeasaun ofisiál eleitorál ne'ebé la mosu konsidera katak la válidu. (Ne'e sei aplika mós ba ita: karik ita la to'o tuir oras, Sekretáriu Estasaun Votasaun sei substitui ita.)
- Iha tuku 06:45 dadeer, preparasaun hodi hahú votasaun hala'o iha Estasaun Votasaun ida-idak, tuir orientasaun husi Sekretáriu. Atividade hirak ne'e elabora iha *Manuál ba Sekretáriu Estasaun Votasaun*, no inklui sura boletin votus ne'ebé simu, hatudu urna votus ne'ebé mamuk no taka. Ita tenke prepara an hodi fó apoio liuhusi konsellu kona-ba pontu ruma ne'ebé la klaru.
- Molok tuku 07:00 dadeer, ita tenke garante katak Estasaun Votasaun nia Kontroladór sira Liña votasaun nian komprende sira-nia knaar, no iha ho sira, ekipamentu no materiál ne'ebé presiza hodi hala'o sira-nia serbisu: espesifiku liu, luvas no máskara (se disponivel) ne'ebé atu fó ba votante sira. Ita tenke verifika mós katak sira hatais sira-nia ekipamentu protesaun: luvas no máskara.
- No mós, molok tuku 07:00 dadeer, ita tenke garante katak lista kandidatu sira nian taka iha fatin tama ba Sentru Votasaun. Ita tenke verifika mós katak, taka mós poster ho informasaun ne'ebé STAE fornese.
- Molok tuku 07:00 dadeer, ita tenke verifika katak ita-nia Estasaun Votasaun sira prontu atu loke no simu votante sira. Karik pelumenus Estasaun Votasaun ida prontu, ita deve deklara katak Sentru Votasaun loke, no hakerek oras loke nian iha Akta Sentru Votasaun.
- Karik ita simu informasaun husi Sekretáriu Votasaun katak laiha materiál balun ne'ebé STAE tenke haruka, ita tenke fó hatene kedes ba Diretor Municipal STAE nian.
- Karik tanba razaun ruma laiha Estasaun Votasaun ne'ebé prontu atu loke iha tuku 07:00 dadeer, ita tenke:
 - hala'o asaun ne'ebé prátku hodi asegura katak pelumenus ida prontu atu simu votantes lais liu tuir possibilidade;
 - fó hatene ba fiskais, observadór no monitorizadorhotu-hotu;

- haruka Kontroladór Liña votasaun sira Estasaun Votasaun nian atu fó hatene ba votante hirak ne'ebé hein katak sei atraza uitoan; no
- hakerek iha Akta Sentru Votasaun oras ne'ebé votasaun hahú.

Karik prosesu hahú votasaun atraza liu minutu 30, ita tenke fó hatene ba Diretor Municipal STAE nian lais liu tuir posibilidade.

8.4 Iha etapa hotu-hotu prosesu nian ita tenke prontu atu fó esplikasaun ba fiskais, observador, monitorizador sira no supervisor CNE nian sira kona-saida mak hala'o.

Parte 9 - Kontajen iha loron eleisaun

9.1 Ita mak dirije kontajen ba votus hotu-hotu iha ita-nia Sentru Votasaun nia Estasaun Votasaun hotu-hotu, nu'udar prosesu ida deit. Bainbain, bainhira to'o iha prosesu kontajen nian mak komesa mosu difikuldade. Ofisiál sira ne'ebé hala'o kontajen tenke halo desizaun kona-ba votus atus ba atus ne'ebé bele afeta kuantidade votus ba kandidatu ida-idak, no fiskais sira bele iha motivasaun boot liu atu halo protestu kona-ba desizaun duké durante prosesu votasaun nian. Ema hotu-hotu ne'ebé prezente kolen, no sei kolen liu tan tuir prosesu naruk kontajen nian, tanba ne'e dala ruma ema nervozu lais liu. Problema hirak ne'e sei sai boot liu karik prosesu kontajen la la'o ho transparénsia no efikásia.

9.2 Hodi hamenus perigu katak problema hirak ne'e sei akontese, ita bele hala'o etapa hirak tuir mai.

- Tenke halo planu halo didi'ak ba kontajen hanesan ho votasaun nian.
- Ita tenke fó informasaun ba fiskais, observadór no monitorizador sira molok hahú kontajen, fó esplikasaun kona-ba etapa oinoin prosesu nian, no sé sé mak sei halo saida. Bainhira prosesu kontajen liu husi etapa ida ba etapa seluk, ita tenke esplika fila fali saida mak atu akontese iha etapa oin mai.
- Ita tenke prepara an hodi fó esplikasaun kona-ba desizaun ruma ne'ebé ita foti ne'ebé iha posibilidade katak bele sai probleme ida, liuliu kona-ba votus ne'ebé válidu ka inváldu. Kontrola fatin tama ba Sentru votasaun.

Planu molok hala'o kontanjen

9.3 Tanba perigu sira Covid nian ne'ebé iha relasaun atividade sira ne'ebé hala'o iha uma laran, planu kona-ba kontajen tenke foka maka'as ba medida sira seguransa Covid nian.

- Sala ne'ebé luan no ho ventilasaun di'ak, di'akliu no seguru liu duké sala ki'ik iha ne'ebé anin la sirkula.

- Asesu ba prosesu kontajen tenke limitadu ba deit pesoál hirak ne'ebé nesesáriu hodi hala'o, no ema seluk ne'ebé iha autorizasaun atu prezente iha ne'ebá, hanesan fis-kais, observadór, monitorizador no reprezentante mídia sira nian.
- Prezensa husi membru sira publiku nian ne'ebé hakarak haree prosesu kontajen re-prezenta perigu boot ida ba tranzmisaun Covid nian, no karik balun mosu duni, sira tenke hela husi li'ur, no hambriik dook husi janela no odamatán sira hodi garante katak sira la taka sirkulasaun anin nian. sira tenke mós manteindistansiamentu sosiál, dezinfeta sira-nia liman, no uza máskara. Ita tenke garante katak kontrola maka'as ema lubuk boot.
- Iha planeamentu no implementasaun kontajen nian, tenke konsidera mós distansiamentu sosiál metru 1 nian (ba pesoál ne'ebé halo kontajen no hirak ne'ebé marka prezensa ofisiál). Fiskal, observadór, hirak ne'ebé akompaña prosesu no profisionál sira mídia nian tenke mós dook malu.
- Prosesu kontajen tenke inkorpora medida padraun dezinfesaun no ijiéne seguransa - Covid nian hanesan dezinfeta liman , no uza máskara no luvas.

9.4 Em jerál, ita tenke halo planu kona-ba fatin iha ne'ebé mak ita atu trata kona-ba boletin votus nian. Tenke iha fatin ka meza ketak ida (ka meza barak) hodi bele halo butuk votus nian ba kandidatu ida-idak; no butuk ida-idak tenke tau keta-ketak hodi labele kahur malu. Butuk ida-idak tenke iha naran kandidatu nian, hodi nune'e hotu-hotu ne'ebé prezente bele haree katak boletin ho votu ba kandidatu ida tau lolos iha kandidatu ne'e nia butuk.

9.5 Hanesan mós, surat tahan hodi hakerek votus ba kandidatu ida-idak tenke tau iha didin-lolon iha fatin ne'ebé ema hotu-hotu ne'ebé prezente bele haree, maibé besik fatin sura votus nian hodi garante katak pesoál ne'ebé hakerek votus bele rona moos bainhira fó hatene votu ba kandidatu ida ne'ebé.

Eskema jerál kontajen nian

9.6 Jeralmente kontajen hala'o hanesan tuir mai.

- Molok atu hahú kontajen, Sekretáriu Estasaun votasaun ida-idak tenke hala'o "rekonsiliaun" no sura boletin votu hirak ne'ebé la uza, kansela ka so'e. Propózitu prosesu rekonsiliaun nian mak atu determina boletin votu hira mak tenke iha urna votasaun. Detalles kona-ba oinsá atu hala'o inklui iha *Manuál ba Sekretáriu Estasaun Votasaun*.
- Fiskais, observadór, monitorizador no profisionál mídia sira nian ne'ebé prezente iha direitu atu tuir aspetu rua hotu rekonsiliaun no kontajen nian.
- Hafoin ramata rekonsiliaun, Sekretáriu Estasaun votasaun ida-idak sei entrega ba ita urna votasaun ka urna votasaun sira, hamutuk ho Akta Estasaun votasaun nian.

9.7 Hafoin ne'e prosesu envolve etapa hirak tuir mai.

- Ita tenke verifika xavi seguransa urna votasaun sira nian, konfirma katak sei tomak, konvida fiskais, observadór no hirak ne'ebé akompaña prosesu atu hakerek númeru serie, no hafoin ne'e silu tohar xavi seguransa no loke urna sira.
- Pesoál hirak ne'ebé ita nomeia tenke hasai boletin votu sira husi urna votasaun sira. Karik ita-nia Sentru votasaun iha Estasaun votasaun rua ka liu, konteúdu urna votasaun husi Estasaun votasaun sira labele kahur hamutuk iha momentu ne'e.
- Pesoál sira hala'o inspesaun ba boletin votu sira, loke boletin votu nian, fila oin tun no tau didi'ak iha butuk tahan 50, hodi nune'e sira bele verifika katak iha karimbu no asinatura Kontroladór boletin votu nian.
- Hafoin ne'e, ita determina kuantidade totál boletin votu ne'ebé ita hasai husi urna votasaun. Karik kuantidade ne'ebé determina la hanesan ho kuantidade ne'ebé tuir rekonsiliaun tenke iha urna laran, tenke sura fali boletin votu ida-idak hodi konfirma katak kontajen loos duni. Karik kontinua iha diferensa entre kuantidade boletin votu ne'ebé sura no kuantidade ne'ebé tuir rekonsiliaun tenke iha urna laran, ita tenke hakerek iha Akta Sentru Votasaun nian.
 - Ita tenke hakerek iha Akta Sentru votasaun nian, kuantidade boletin votu ho karimbu no asinatura kontroladór boletin votu nian, ne'ebé iha urna laran.
- Boletin votu iha urna laran ne'ebé laiha karimbu ka asinatura kontrolador boletin votu nian, haketak husi boletin sira seluk, tau karimbu "rejeita" no ita sura kuantidade ho lian maka'as no hakerek iha Akta Sentru Votasaun.
- Bainhira iha Estasaun Votasaun rua ka liu iha Sentru Votasaun, boletin votu iha urna laran ne'ebé laiha karimbu "rejeita" kahur hamutuk ho boletin votu seluk ho karakteristika hanesan husi Estasaun votasaun sira seluk, no butuk didi'ak ho tahan 50.

9.8 Hafoin ne'e, hateten sai ho lian maka'as, votu ne'ebé marka iha boletin votu, hi'it sai boletin votu ida-idak hodi hatudu ba ema ne'ebé prezente, no halo butuk ne'ebé korresponde ba kandidatu ida-idak, votu mamuk no votu ne'ebé iha protestu.

Kontajen Votu individuál - Sura Votu ida-idak

9.9 Sura votu ida-idak ne'ebé marka iha boletin votu mak parte importante liu iha prosesu kontajen nian. Detalles kona-ba oinsá tenke halo hanesan tuir mai.

- Pesoál ida ne'ebé ita nomeia simu boletin votu ida husi hirak ne'ebé seidauk sura.
- Nia verifika, hi'it sa'e hodi nune'e fiskais, observadór no supervizador CNE bele haree, no hatete sai ho lian maka'as, **naran** kandidatu ne'ebé simu votu ne'e.

- Boletin votu “Inváldu” (no nune’e la fó votu ba kandidatu ruma) bainhira:
 - “votu mamuk”, bainhira votante la halo marka ka ko’ak ruma iha boletin votu;
 - Boletin votu “Nulu”, bainhira:
 - iha marka ka ko’ak maibé imposivel atu hatene loloos sé mak votante hili;
 - permite atu halo identifikasiun ba votante;
 - hili kandidatu ne’ebé mate ka la kandidata ona ba eleisaun; ka
 - ka ko’a parte ida, pinta dezeñu ruma ka apaga parte ruma, ka hakerek liafuan ruma iha boletin votu.
- Karik boletin votu inváldu, pesoál ne’ebé halo kontajen hatete sai ho lian maka’as katak inváldu, no mós razaun tanbasá inváldu. Boletin “mamuk” no “nulu” tau iha butuk ketak.
- Karik fiskal ida hakarak halo protestu formál kontra Sekretáriu nia desizaun kona-ba validade ka kona-ba kandidatu ida ne’ebé mak simu votu, nia tenke halo kedas protestu iha momentu ne’e.
- Hafoin ne’e, boletin votu entrega ba pesoál ida husi sira ne’ebé responsavel atu rai boletin hirak ne’ebé sura tiha ona, hodi tau iha butuk ne’ebé korresponde ho kandidatu ne’ebé simu votu (ka, karik boletin inváldu, tau iha butuk ne’ebé korresponde tuir razaun nu’usá inváldu (boletin mamuk, votante hili maibé la klaru, nst.)) Boletin hirak ne’ebé iha protestu formál sei tau iha butuk ketak ida.
- Pesoál seluk fali ne’ebé hetan nomeasaun tau marka iha formuláriu kontajen ba kandidatu ne’ebé naran hatete sai (ka tuir razaun tanbasá inváldu). Marka ne’ebé halo tenke halo tuir lubuk lima hanesan iha exemplu.


ELEISAUN PREZIDENSIAL 2022																	
Kódiga Sentru Votasaun Naran Sentru Votasaun	00007 SEDE SUKO FATOUSA				Município Ponta Administrativa	AILEU AILEU				Suku Data	FAFU BOSSA 19/3/2022						
NARAN KANDIDATU	1	2	3	4	5	6	7	8	9	10	11	12	13	14	15	TOTAL KADA UNA	TOTAL VOTU NE'EBÉ HETAN
KANDIDATU 1																18	18
KANDIDATU 2															75	243	
															75	18	
KANDIDATU 3																4	4
KANDIDATU 4																18	
KANDIDATU 5																3	3
KANDIDATU 6																3	
KANDIDATU 7																4	4
KANDIDATU 8															75	247	
															75	22	
Total Votu Válidu																	540
VOTU NULU																31	
VOTU BRANKU																7	

- Bainhira iha protestu formál, la tau marka iha formuláriu kontajen.
- Prosesu ne'e repete to'o sura boletin hotu-hotu.

9.10 Protestu formál ba desizaun kona-ba boletin votu sei rezolve kedas bainhira aprezenta, tuir prosesu ne'ebé deskreve iha parágrafu 7.10 no 7.11, no tau marka iha fatin appropriadu formuláriu kontajen nian hodi hatudu rezultadu prosesu nian. Boletin votu hirak ne'ebé hetan protestu sei tau hamutuk hotu iha envelope ketak ida no hakerek "Boletin Votu Reivindikadu".

9.11 Hafoin ne'e, sura marka sira iha formuláriu kontajen nian. Karik hafoin sura no soma hotu votu invalidu sira ita haree katak número totál votu nian ba kandidatu ida-idak, no número votu inválidu la hanesan ho rezultadu uluk nian bainhira sura boletin votu ida-idak, ita tenke haruka sura fila fali boletin votu ida-ida iha butuk kandidatu ida-idak nian, no iha butuk kategoria oinoin boletin votu inválidu no reivindikadu hodi bele rezolve asuntu ne'e.

9.12 Hodi evita defikuldade ho prosesu ne'e, importante tebes katak boletin ne'ebé la sura no boletin ne'ebé sura tau iha fatin keta-ketak hanesan tuir mai.



9.13 Tuir realidade, ita bele simu tulun husi pesoál Sentru votasaun nian hodi hala'o tarefa hanesan hasai boletin votu husi urna sira, loke boletin votu sira, kahur boletin votu sira, hateten sai votus ho lian maka'as, no halo butuk ba boletin votu sira tuir kandidatu ida-idak. Maibé ita tenke bele konfirma katak identifika loloos boletin votu hotu-hotu nu'udar boletin ne'ebé simu ka rejeita, no katak boletin hotu-hotu ne'ebé simu sura ba kandidatu loos.

9.14 Enkuantu prosesu kontajen nian hala'o hela, ita bele uza oportunidde atu hakerek detalles kona-ba rekonsiliaun ne'ebé hala'o iha Estasaun Votasaun ida-idak, kopia husi Akta Estasaun Votasaun ida-idak ba iha Akta Sentru Votasaun. Ita tenke soma número hotu-hotu hodi verifika katak laiha inkonsisténsia ka fallansu ruma, no halo investigasaun kle'an liu no korrije karik nesesáriu.

9.15 Bainhira kontajen iha Estasaun Votasaun ida kompletu, ita tenke hakerek rezultadu iha Akta Sentru Votasaun nian, no konvida fiskais ne'ebé hakarak, atu asina. Sekretáriu sira Estasaun votasaun nian mós tenke asina.

- Karik ita-nia Sentru Votasaun iha Estasaun Votasaun ida deit, ita tenke verifika no kopia dadus rekonsiliaun (inklui boletin votu ne'ebé la uza, kansela no so'e) husi Akta Estasaun Votasaun ba iha Akta Sentru Votasaun.
- Karik ita-nia Sentru Votasaun iha liu Estasaun Votasaun ida, ita tenke verifika no kopia dadus rekonsiliaun nian husi Akta Estasaun Votasaun ida-idak, ba iha Akta Sentru Votasaun, soma hamutuk hotu hodi hetan número totál ba Sentru Votasaun no verifika katak laiha inkonsisténsia ka fallansu ruma, no halo investigasaun kle'an liu no korrije karik nesesáriu.

9.16 Karik, nu'udar rezultadu identifika diferensa ruma, fiskal ruma ne'ebé hakarak submete keixa ka reklamasaun, tenke rezolve tuir prosesu ne'ebé deskreve iha parágrafo 7.10 no 7.11 iha leten.

Konkluzaun prosesu kontajen

9.17 Bainhira ramata kontajen no hafoin rezolve inkonsisténsia ruma, ita tenke prenxe votus ba kandidatu ida-idak, no kuantidade boletin votu ne'ebé tau iha kategoria ida-idak inválidu nian, iha Akta Sentru Votasaun. Ita tenke mós garante katak informasaun tuir mai hakerek loloos iha Akta:

- número votu ne'ebé kandidatu ida-idak simu, no número boletin votu iha kategoria ida-idak invalidu nian;

- númeru xavi seguransa ba urna votasaun ida-idak;
- fatin no kódigu Estasaun Votasaun nian;
- oras loke no taka votasaun;
- naran ofisiál eleitorál no fiskais kandidatu sira nian; no
- númeru totál no detalles kona-ba protestu no reklamaun ne'ebé iha, no desizaun ne'ebé foti.

9.18 Bainhira hakerek númeru votus ida-idak iha Akta, ita tenke:

- tau votu kandidatu ida-idak nian iha envelope keta-ketak; no
- dala ida tan, iha envelope ketak tau
 - votu mamuk;
 - votu nulu no inváldu; no
 - votu hirak ne'ebé sujeitu ba protestu formál husi fiskais sira.

9.19 Hafoin ne'e ita tenke taka no asina envelope sira no garante katak hakerek loloos hodi hatudu númeru boletin votu iha laran, naran Sentru Votasaun no númeru kódigu ne'ebé korresponde, no munisípiu no suku Sentru Votasaun nian.

9.20 Ita tenke mós taka notifikasi saun rezultadu nian iha fatin ne'ebé fasil atu haree, no besik fatin ne'ebé hala'o Sentru Votasaun

9.21 Hafoin ne'e, tuir instrusaun ne'ebé STAE sei fó, ita tenke:

- Fó hatene ba STAE kona-ba rezultadu kontajen nian;
- Haloot materiál hotu-hotu husi Sentru votasaun; no
- lori fila fali materiál hotu-hotu ba Sentru Apuramentu Munisipál no Rejionál.

Parte 10 - Rezolve problema no emerjénsia sira

10.1 Parte ne'e haree ba difikuldade no emerjénsia oin-oin ne'ebé bele mosu durante votasaun no kontajen. Tanba imposivel atu bele prevee problema hotu-hotu ne'ebé bele mosu, lista ne'e la kompletu. Difikuldade hirak ne'ebé la inklui iha lista ne'e, tenke rezolve tuir konsulta ho Prezidente Sentru Votasaun nian, no karik nesesáriu, ho Diretör Munisipál STAE nian, la haluha no hanoin beibeik nesesidade atu hala'o tuir dalan ne'ebé nakloke no transparente.

Materiál importante la suficiente

10.2 Sekretáriu sira Estasaun votasaun nian mak responsavel hodi tau matan bá no kontrola oinsá uza materiál importante inklui mós no liuliu ba boletin votu, tinta indelével, mós materiál ne'ebé presiza ba seguransa kontra Covid, hanesan máskara, luvas, no aimoruk dezinfeta nian. Sira tenke fó hatene ba ita sedu liu tuir possibilidade katak sasán menus hodi nune'e ita bele foti medida hodi rezolve. Medida hirak ne'e bele inklui:

- Transfere materiál husi Estasaun votasaun seluk iha Sentru votasaun; no/ka
- Husu Diretor Municipal STAE nian atu fornese tan materiál.

10.3 Karik materiál importante hotu, iha Estasaun votasaun, Sekretáriu Estasaun votasaun nian tenke fó hatene ba ita, no notifika mós ba fiskais, observadór no supervisor hoi CNE kona-ba saída mak akontese no medidas saída mak implementa hodi rezolve. Hafoin ne'e ita tenke hatete sai ba votante sira katak votasaun tenke para durante tempu badak no fó hatene ba Kontroladór Liña votasaun Estasaun votasaun nian katak hapara votasaun; no karik Sentru Votasaun iha Estasaun Votasaun barak liu ida, Kontroladór Liña votasaun tenke haruka votante hirak ne'ebé to'o, atu ba Estasaun Votasaun seluk ne'ebé sei hala'o, to'o nia simu fali informasaun katak simu ona materiál. Ita tenke hakerek iha Akta Sentru Votasaun, oras ne'ebé hapara no hahú fila fali votasaun.

Asidente ka moras

10.4 Karik ema ruma iha Sentru Votasaun hetan asidente ruma hanesan monu, ka moras derepente, pesoál eleitorál tenke fó asisténsia tomak tuir possibilidade. Etapa ne'ebé ita bele hala'o sei depende ba sirkúnstásia sira, maibé bele inklui:

- Immediatamente fó primeiru sukorr, ka buka ajuda husi ajente sira PNTL ne'ebé besik hodi halo;
- kontakta autoridade lokál saúde nian, ka ema ne'e nia familia;
- bainhira Sentru Votasaun iha Estasaun Votasaun rua ka liu, haruka votante sira ba Estasaun Votasaun seluk husi ida ne'ebé mosu problema.

10.5 Iha kazu ne'ebé resulta ema kanek maka'as ka mate, ita tenke fó hatene ba Diretor Municipal STAE nian lais liu tuir possibilidade kona-ba saída mak akontese. Iha kazu hotu-hotu, ita tenke hakerek etapa hotu-hotu ne'ebé hala'o iha Akta Sentru Votasaun.

Kazu iha ne'ebé imposivel atu hala'o votasaun ka tenke Suspende votasaun

10.6 Tuir sirkunstânsia balun, bele laiha possibilidade atu hala'o votasaun iha ita-nia Sentru Votasaun. Iha kazu hanesan ne'e tenke fó hatene kendas ba delegadu lokál CNE nian.

10.7 Karik akontese dezastre naturál loron tolu molok loron eleisaun, ita tenke fó hatene ba Koordenadór Munisipál STAE nian lais liu tuir possibilidade, hodi nune'e, nia hamutuk ho delegadu lokál CNE nian bele foti desizaun atu muda Sentru votasaun ba fatin ne'ebé iha seguransa liu. Hafoin ne'e, votasaun sei hala'o loron ida hafoin loron eleisaun.

10.8 Karik, iha loron eleisaun:

- La konsege monta Sentru votasaun ka Estasaun votasaun; ka
- disturbiu ka dezastre naturál interrompe prosesu eleitorál durante oras rua ka liu;

ita tenke taká metin urna votus ne'ebé iha ona votus balun iha laran, no haruka ba Sentru Apuramentu Munisipál no Rejionál. Tenke haruka votante hirak ne'ebé seidaük vota no fis-kais sira ba Sentru votasaun seluk iha Suku ne'ebé hanesan, karik iha, ka Sentru votasaun iha Suku seluk ne'ebé besik liu, ita tenke haruka mós ita-nia pesoál no mós lista votantes nian ho urna votus mamuk no material eleisaun seluk.

10.9 Ita iha poder atu suspende votasaun iha ita-nia Sentru Votasaun, maibé ita tenke halo deit bainhira mosu situasaun grave, ne'ebé tuir ita-nia hanoin prevene votasaun atu kontinua tuir orden no ho efikasia. Ezemplu kona-ba ida ne'e, bele inklui emerjénsia mé-dika, asidente boot, perigu ne'ebé atu akontese tanba bee atu sa'e ka railakan ne'ebé besik ona, mosu balada rumá ne'ebé perigozu, ka disturbiu, ema agresivu ka iha violénsia iha, ka besik Sentru Votasaun. Tempu suspensaun nian tenke tuir deit nesesidade sirkunstánsia nian.

10.10 Karik ita suspende votasaun, ita tenke fó hatene ba membru PNTL sira iha fatin, no fó instrusaun ba Kontroladór Liña votasaun Estasaun Votasaun nian atu fó hatene ba votante sira (karik iha possibilidade). Ita tenke mós fó hatene ba Diretor Munisipál STAE nian, no hakerek detalles suspensaun nian iha Akta Sentru Votasaun.

10.11 Karik suspensaun votasaun nian kleur liu oras rua, ita sei labele hahú fila fali votasaun. Ita-nia hahalok tenke tuir prosedimentu ne'ebé hakerek iha 10.8 iha leten no fó hatene ba delegadu lokál CNE nian.

10.12 Karik ita-nia Sentru Votasaun iha Estasaun Votasaun barak, depende ba sirkunstánsia, bele iha possibilidade atu suspende votasaun iha Estasaun Votasaun ida dei't, no kontinua hala'o votasaun iha sira seluk. Votasaun tenke hahú fila fali bainhira rezolve problema, no Sekretáriu Estasaun Votasaun sira nian fó hatene ba ita katak sira prontu atu hahú fila fali funzionamentu.

Aneksu 1 - Ezemplu Akta Sentru Votasaun

REPÚBLICA DEMOCRÁTICA DE TIMOR-LESTE
MINISTÉRIO DA ADMINISTRAÇÃO ESTATAL
SECRETARIADO TÉCNICO DE ADMINISTRAÇÃO ELEITORAL

**AKTA OPERASAUN SENTRU VOTASAUN
ELEISAUN PREZIDENSIAL 2022**

Kódigu Sentru Votasaun

Munisipiu/RAEOA

Naran Sentru Votasaun

Postu Administrativu

Óras Hahú

Suku

Óras Remata

Data

de Março de 2022

ESTASAUN VOTASAUN

	1	2	3	4	5
Númeru Xavi Kaixa Vota Sorin Los					
Númeru Xavi Kaixa Vota Sorin Karuk					
Númeru Númeru Xavi Kaixa Leten					

ESTASAUN VOTASAUN

1	2	3	4	5

(i) Buletin votu hira maka simu bainhira votasaun hahú

(ii) Buletin Votu ne'ebé aumenta iha Votasaun nia klaran

(iii) Buletin Votu ne'ebé hamenus iha Votasaun nia klaran

A.Total Buletin votu ne'ebé maka simu (i) + (ii) - (iii)

B. Buletin Votu hira maka la uza

C. Buletin votu Kanseladu

D. Total buletin votu ne'ebé maka uza (A-B-C)

E. Buletin Abandonadu

F. Totál Votantes ne'ebé Vota iha Estasaun Votu

G. Total Buletin Votu iha Kaixa Vota Estasaun nian (F-E)

Totál Votantes ne'ebé Vota iha Sentru Votasaun

$(F1+F2+F3+F4+F5)$

--

Totál Votantes Mane ($Fm1+Fm2+Fm3+Fm4+Fm5$)

--

Totál Votantes Feto ($Ff1+Ff2+Ff3+Ff4+Ff5$)

--

Totál Buletin Votus iha Sentru Votasaun ($g1+g2+g3+g4+g5$)

--

REZULTADU KONTAGEM IHA SENTRU VOTASAUN

A. Totál Votu Válidu	<input type="text"/>	B. Totál Votu Nulu	<input type="text"/>	C. Totál Votu Branku	<input type="text"/>
D. Totál Votu Rezeitadu	<input type="text"/>	E. Totál Votu Reklamadu	<input type="text"/>		

NO	NARAN KANDIDATU	TOTAL VOTU NE'EBÉ HETAN
1.		
2.		
3.		
4.		
5.		
6.		
7.		
8.		
9.		
10.		
11.		
12.		
13.		
14.		
15.		
16.		

LISTA OFISIAL ELEITORAL

NARAN	NU. KARTAUN ELEITORAL	POZISAUN	ASINATURA
		PREZIDENTE SENTRU VOTASAUN	
		SEKRETARIU ESTASAUN	
		SEKRETARIU ESTASAUN	
		SEKRETARIU ESTASAUN	

		<i>SEKRETARIU ESTASAUN</i>	
		<i>SEKRETARIU ESTASAUN</i>	

LISTA FISKAIS KANDIDATURA BA ELEISAUN PREZIDENSIAL 2022

OBSERVASAUN

Aktividade no Nia Lalaok Durante Prosesu Eleitoral

NÚMERU XAVI KAIXA TRANSPORTASAUN MAI SENTRU APURAMENTU MUNISIPAL/RAEOA					
	1		2		3
	Sensitivu	La'os Sensitivu	Sensitivu	La'os Sensitivu	Sensitivu
Númeru Xavi Kaixa Vota Sorin Los					
Númeru Xavi Kaixa Vota Sorin Karuk					
Númeru Númeru Xavi Kaixa Leten					

Data, de Março de 2022

Prezidente Sentru Votasaun

Naran no Asinatura

**AKTA REZULTADU SENTRU VOTASAUN
ELEISAUN PARLAMENTAR 2022**

KÓDIGU SENTRU VOTASAUN	
NARAN SENTRU VOTASAUN	
MUNISIPIU/RAEOA	
POSTU ADMINISTRATIVU	
SUKU	
DATA	

A. TOTÁL VOTU VÁLIDU

B. TOTÁL VOTU NÚLU

C. TOTÁL VOTU BRANKU

D. TOTÁL VOTU REZEITADU

E. TOTÁL VOTU REKLAMADU

TOTAL ELEITOR MAI VOTA

NO	NARAN KANDIDATU	TOTAL VOTU NEBE HETAN	NARAN FISKAIS KANDIDATURA	ASINATURA
1.				
2.				
3.				
4.				
5.				
6.				
7.				
8.				
9.				
10.				
11.				
12.				

13.				
14.				
15.				
16.				

Data, de Março de 2022
Prezidente Sentru Votasaun
Naran no Asinatura

Aneksu 2 - Materiál ne'ebé atu fornese ba Sentru no Estasaun Votasaun ida-idak

Lista materiál tuir mai inklui iha Aneksu ba Dekretu Governu No. 7/2017 (Regulamentasaun Prosedimentu Votasaun, kontajen Votus nian no Determinasaun Rezultadu sira nian) tuir emenda iha 2022.

1. Urna Votasaun nian ho número xavi seguransa respetivu;
2. Boletin votu sira;
3. Tinta Indelével;
4. Kabina votasaun ne'ebé natoon;
5. Formuláriu Akta operasaun eleitorál ne'ebé inklui dokumentu hirak tuir mai;
6. Formuláriu rezultadu Eleitorál;
7. Lista prezensa ofisiál eleitorál sira nian;
8. Deklarasaun segredu nian hodi ofisiál eleitorál sira asina;
9. Livru observasaun/komentáriu nian;
10. Lista Votante sira nian;
11. Lista adisionál votantes nian;
12. Lista votante ne'ebé serbisu hela;
13. Lista ambulante;
14. Formuláriu ho rezultadu apuramentu nian hodi taka iha fatin públiku;
15. Formuláriu entrega materiál nian;
16. Sinál hodi taka iha Estasaun Votasaun;
17. Formuláriu avizu nian ba naran ofisiál eleitorál sira nian;
18. Ezemplu boot boletin votu nian;
19. Formuláriu reklamasaun no protestu nian;
20. Etiketa ba ofisiál eleitorál sira, kandidatu sira, ajente no observadór sira;
21. Karimbu ho liafuan “KANSELADU”;
22. Karimbu ho liafuan “REKLAMADU”;
23. Karimbu ho liafuan “BRANKU”;
24. Karimbu ho liafuan “NULU”;
25. Karimbu ho liafuan “LA UZA”;
26. Karimbu ho liafuan “REJEITADU”;
27. Karimbu ho liafuan “ABANDONADU”;
28. Karimbu ho liafuan “Eleisaun Prezidensiál 2022”;
29. Envelope ba boletin votu validu;
30. Envelope ba boletin votu branku;
31. Envelope ba boletin votu nulu;
32. Envelope ba boletin votu reklamadu;
33. Envelope ba boletin votu kanseladu;
34. Envelope ba boletin votu la uza;
35. Envelope ba boletin votu rejeitadu;
36. Envelope ba boletin votu Abandonadu;
37. Lista kompletu ba kandidatu sira eleisaun prezidensiál no suplente sira;
38. Kalkuladór;
39. Agrafadór, lapizeira no pregu natoon;
40. Fita kola;
41. Formuláriu Akta Estasaun Votasaun nian;

42. Formuláriu rezultadu Sentru votasaun;
43. Formuláriu entrega Urna Votasaun nian husi Sentru Votasaun ba iha Sentru Apuramentu Nasional;
44. Formuláriu reklamasaun no protestu nian;
45. Xavi seguransa ho número kódigu;
46. Urna Votasaun hodi halo transporte ba akta no votu hirak ne'ebé iha reklamasaun (karik iha);
47. Envelope;
48. Materiál seluk eskritóriu nian ne'ebé nesesáriu.
49. Materiál protetivu pesoál kontra COVID-19, ne'ebé inklui máskara, luvas, vizeira, ropa protetivu kompletu, dezinfetante líkidu no despozitivu sukat temperatura isin-lolon nian sira.

Iha intensaun katak sei fornese mós sasán iha lista ida tuir mai ne'ebé sei tulun atu prevene tranzmisaun Covid nian.

1. Se disponivel, luvas plástiku no máskara ba votante sira - próprio ba Covid.
2. Saku so'e fo'er ne'ebé hambrik mesak 75cmX75cm.
3. Dezinfetante liman nian - 500ml.
4. Dezinfetante